



**CONVENIO DE COLABORACIÓN ENTRE A CONSELLERÍA DE POLÍTICA SOCIAL E A ASOCIACIÓN ARELA NO DESENVOLVEMENTO DUN PROGRAMA DE CAPTACIÓN, VALORACIÓN, FORMACIÓN E SEGUIMENTO DE PERSOAS OU FAMILIAS PARA CONVIVIR CON ADOLESCENTES QUE TEÑAN QUE CUMPRIR UNHA MEDIDA DE CONVIVENCIA CON PERSOA OU FAMILIA NAS PROVINCIAS DE CORUÑA E PONTEVEDRA.**

En Santiago de Compostela, a de 21 de decembro de 2018

**REUNIDOS**

Dunha parte Fabiola García Martínez, Conselleira de Política Social, nomeada polo Decreto 98/2018, do 26 de setembro, do, actuando en nome e representación da Xunta de Galicia, no uso das facultades que lle veñen atribuídas no artigo 34 da Lei 1/1983, de 22 de febreiro, de normas reguladoras da Xunta e da súa presidencia, no Decreto 88/2018, do 26 de setembro, polo que se establece a estrutura orgánica da Xunta de Galicia e segundo o Decreto 176/2015, do 3 de decembro, polo que se establece a estrutura orgánica da Consellería de Política Social.

Doutra parte, don Santiago Fernández Fandiño, con DNI n.º 36114736K, presidente da Asociación Arela, que actúa en nome e representación desta, con CIF nº G36846152 e con domicilio social en rúa Ernesto Lecuona n.º 11 baixo de Vigo, estando expresamente facultado para a formalización do convenio en virtude dos estatutos da asociación, que constan inscritos no Rexistro Central de asociacións co número 1998-127-1.

Ambas as dúas partes, con capacidade xurídica bastante e os representantes con poderes suficientes e axeitados en dereito para obrigar as súas representadas,

**EXPOÑEN**

**PRIMEIRO.**

A Consellería de Política Social, través da Dirección Xeral de Familia, Infancia e Dinamización Demográfica, ten asumidas entre as súas competencias, de acordo co establecido no artigo 13 do Decreto 176/2015, do 3 de decembro, polo que se establece a estrutura



orgánica da Consellería de Política Social, a execución das medidas ditadas polos xulgados de menores nos termos establecidos na Lei orgánica 5/2000, do 12 de xaneiro, reguladora da responsabilidade penal dos menores (en diante LORPM).

## **SEGUNDO.**

O artigo 7. 1. j) da LORPM regula dentro das medidas susceptibles de ser impostas aos menores a de convivencia con outra persoa, familia ou grupo educativo.

A persoa sometida a esta medida debe convivir, durante o período de tempo establecido polo xuíz, con outra persoa, cunha familia distinta a súa ou cun grupo educativo, axeitadamente seleccionados para orientala no seu proceso de socialización.

## **TERCEIRO.**

A asociación ARELA, inscrita no Rexistro de Entidades Prestadoras de Servizos Sociais da Consellería de Política Social co número E4168, é unha entidade sen ánimo de lucro que ten como fins o desenvolvemento integral da infancia e da mocidade en Galicia en situación de desprotección e/ou conflito social, fomentando iniciativas de calidade e normalizadoras, cun compromiso continuo pola xustiza social, a través da implicación das persoas que a constitúen.

## **CUARTO.**

Un dos aspectos claves sobre os que se vertebra a medida de convivencia con outra persoa, familia ou grupo educativo é a existencia de persoas ou familias que colaboren na execución da dita medida, proporcionando á persoa menor un entorno diferente ao propio, no que desenvolva as súas vivencias básicas e educativas.

## **QUINTO.**

A asociación ARELA ven desenvolvendo con éxito nas provincias da Coruña e Pontevedra un programa destinado á captación, valoración, formación e seguimento de persoas ou familias para convivir con adolescentes que teñan que cumprir coa medida de convivencia, establecendo unha rede de contactos e relacións que a configura como referente para persoas ou familias interesadas en colaborar na medida.

Esta entidade ten subscrito coa Consellería de Política Social un convenio de colaboración para levar a cabo a unha intervención



educativa integral con persoas menores que teñan que cumprir medidas xudiciais e outras actuacións en medio aberto previstas na Lei orgánica 5/2000, do 12 de xaneiro, reguladora da responsabilidade penal dos menores na provincia de Pontevedra. Ao abeiro do establecido no dito convenio leva a cabo un labor centrado na reinserción e reeducación das persoas menores que executan medidas non privativas de liberdade nesa provincia, incluída a de convivencia con outra persoa, familia ou grupo educativo, o que redunda nun coñecemento directo das características das persoas menores de cara a seleccionar a persoa ou familia máis idónea. A maior abundancia dispón dun tecido asociativo amplo, o que facilita a difusión e visibilidade do programa.

#### **SEXTO.**

O artigo 96.2 da Lei 3/2011, do 30 de xuño, de apoio á familia e á convivencia en Galicia recolle a posibilidade de colaboración con entidades privadas sen ánimo de lucro no exercicio das funcións que lle correspondan ao abeiro do establecido na dita lei.

#### **SÉTIMO.**

A Consellería de Política Social considera de especial importancia establecer un marco de colaboración coa Asociación Arela que permita a captación, valoración, formación e seguimento de persoas ou familias para convivir con adolescentes que teñan que cumprir unha medida de convivencia con persoa ou familia nas provincias de A Coruña e Pontevedra.

#### **OITAVO.**

A Consellería de Política Social e a asociación ARELA teñen como obxectivo común procurar a súa reinserción e reeducación das persoas menores para o que consideran necesario contar con persoas ou familias que colaboren na execución da medida de convivencia, na súa vertente de convivencia con outra persoa ou familia, proporcionando á persoa menor un contexto social normalizado e estruturado nun entorno diferente do seu, no que desenvolver as súas vivencias básicas e educativas.

#### **NOVENO.**

Ambas partes teñen en conta as Regras Mínimas das Nacións Unidas para a Administración de Xustiza a Menores ( Regras de Beijing), do 29 de novembro de 1985 e na Convención sobre os dereitos do neno de 20 de novembro de 1989.



364612



Polo exposto, as partes comparecentes na representación que ostentan acordan asinar o presente convenio de colaboración en base ás seguintes

## CLÁUSULAS

### PRIMEIRA. Obxecto

O presente convenio de colaboración ten por obxecto establecer o marco de colaboración entre a Consellería de Política Social da Xunta de Galicia e a Asociación ARELA para o financiamento dun programa a desenvolver no ano 2019, dirixido á captación, valoración, formación e seguimento de persoas ou familias para convivir con menores que teñan que cumprir unha medida de convivencia con outra persoa, familia ou grupo educativo, posibilitando o mantemento dunha rede que permita en todo momento a execución das medidas deste tipo que diten os xulgados de menores de Coruña e Pontevedra.

### SEGUNDA. Beneficiarios da actividade

Persoas menores que teñan que cumprir unha medida de convivencia con outra persoa ou familia imposta polos Xulgados de Menores de A Coruña e Pontevedra en virtude de sentenza firme ou auto de adopción de medida preventiva.

### TERCEIRA. Obxectivos e actividades

O obxectivo xeral do programa é contar cunha rede de persoas ou familias en disposición de proporcionar ao menor un ambiente de socialización positivo, mediante a súa convivencia, durante o tempo determinado polo xuíz, cunha persoa ou familia distinta a súa que se ofrezca a cumprir a función da familia no que respecta ao desenvolvemento de pautas socioafectivas prosociais no menor.

Como obxectivos específicos establécense:

- Establecer canles de comunicación con diferentes foros, entidades e asociacións co fin de publicitar o programa.
- Difundir información dirixida á sociedade sobre a lei do menor, as medidas xudiciais e particularmente a medida de convivencia con outra persoa, familia ou grupo educativo e a existencia do programa.
- Informar e formar aos interesados no programa sobre as necesidades e características dos menores.



- Dotar ás persoas e familias do programa de habilidades e estratexias para afrontar a convivencia durante a medida.
- Constituír un espazo de referencia para as persoas e familias de convivencia.
- Establecer unha coordinación eficaz cos profesionais implicados no proceso de execución da medida.

Para a súa consecución, as actuacións que se compromete a levar a cabo a Asociación ARELA durante o período son:

- Captar persoas susceptibles de convivencia cun menor sometido a execución dunha medida xudicial mediante a difusión do programa a través de medios de comunicación e redes sociais así como contactos con institucións, colexios profesionais e colectivos asociacionais.
- Valorar os/as solicitantes mediante entrevistas de carácter psicosocial e visitas domiciliarias por parte das entidades, finalizando cun informe sobre o/a solicitante.

A persoa ou persoas que integren a familia e acepten convivir co menor adquirirán as obrigas civís propias da garda e deberán cumprir necesariamente os seguinte requisitos:

- Estar en pleno exercicio dos seus dereitos civís.
- Non estaren incursas en ningunha das causas de inhabilidade establecidas para os titores no Código Civil.

- Formar ás persoas seleccionadas sobre os seguintes aspectos:

- Marco legal aplicable
- A relación intra familiar ( organización familiar, normas e límites)
- Habilidades e estratexias na convivencia cun menor
- As redes sociais e a súa incidencia no ámbito competencial.
- Perfil dos menores sometidos ao cumprimento de medidas xudiciais.

A formación terá carácter grupal e individual. Neste último caso atenderanse aquelas dúbidas, contidos, habilidades e estratexias que se revelan necesarias co fin de reforzar a formación grupal inicial.

- Levar a cabo un seguimento periódico das familias pertencentes ao programa que estean no banco de familias en espera de acoller, con obxecto de verificar a súa permanencia no programa e a súa situación persoal, socioeconómica e familiar así como as características dos menores susceptibles de ser acollidos. Así mesmo, facer un seguimento das persoas ou familias que estean no



programa, en coordinación co persoal responsable da execución da medida e a entidade pública, coa finalidade de afondar nos diferentes aspectos que poidan ter interese para estas, prestarlles o asesoramento e atención que requiran durante a execución da medida.

#### **CUARTA. Compromisos da Consellería de Política Social**

Para o desenvolvemento do programa a Consellería de Política Social comprométese a:

1. Levar un rexistro actualizado das persoas e familias que colaboran no programa.
- 2.- Establecer mecanismos de coordinación cos responsables de programa, co fin de seleccionar axeitadamente a persoa ou familia de convivencia, atendendo ao perfil da persoa menor e as características da unidade de convivencia.
3. Supervisar e coordinar as actuacións referidas ao desenvolvemento do programa, asegurando que as mesmas se axustan ao obxecto do presente convenio.

#### **QUINTA. Compromisos da Asociación ARELA**

No desenvolvemento do programa a Asociación ARELA comprométese a levar a cabo os obxectivos e actividades sinalados na cláusula terceira e ademais a:

1. Designar un coordinador/a xeral, máximo responsable do programa, que desenvolva as actuacións de coordinación interprovincial e de relacións coa Dirección Xeral de Familia, Infancia e Dinamización Demográfica, así como os profesionais necesarios que levarán a cabo o programa nas provincias de A Coruña e Pontevedra.

2. Proporcionar a través dos seus propios medios ou contando coa colaboración de institucións e entidades, os locais onde se levarán a cabo as actividades de difusión do programa así como a formación das persoas ou familias que colaboren no programa.

3. Comunicar á Dirección Xeral de Familia, Infancia e Dinamización Demográfica as altas e baixas no programa. No caso de que se formalice unha alta no programa debe achegarse toda a documentación necesaria para a súa inclusión no rexistro de persoas ou familias para a execución da medida de convivencia con persoa, familia ou grupo educativo desta dirección xeral.



4. Coordinarse coas xefaturas territoriais competentes de cara a valorar a persoa ou familia axeitada para a execución da medida de convivencia con persoa ou familia e levar a cabo a formalización da dita convivencia.

5. Comunicar á xefatura territorial competente, e no seu caso ao técnico responsable da execución da medida de convivencia con outra persoa ou grupo educativo calquera incidencia que se produza na unidade de convivencia co fin de que dita incidencia sexa comunicada ao xulgado e fiscalía de menores competente.

6. Enviar semestralmente un informe sobre as actuacións levadas a cabo no programa á xefatura territorial correspondente así como á Dirección Xeral de Familia, Infancia e Dinamización Demográfica.

7. Elaborar, dentro do mes seguinte á finalización do programa, unha memoria na que se recollerán entre outros os seguintes aspectos: actividades realizadas (captación, valoración, formación e seguimento), recursos empregados, datos estatísticos, resultados obtidos, valoración global e propostas de mellora.

#### **SEXTA. Persoal para o desenvolvemento do programa**

Para o desenvolvemento do programa Arela contará cun equipo formado por un/ unha psicólogo/a así como un/ha traballador/a social ou educador/a social que desempeñarán as súas funcións a tempo parcial. Ademais contará coa colaboración dun coordinador/a que desenvolva as actuacións de coordinación interprovincial e de relacións coa Dirección Xeral de Familia, Infancia e Dinamización Demográfica.

O equipo que Arela poña a disposición deste programa en ningún caso poderá actuar baixo a dependencia da Consellería de Política Social, debendo ser esta entidade a que imparta as oportunas ordes aos seus traballadores e a que ostente respecto destes o correspondente poder de dirección, conservando os dereitos, obrigas, riscos e responsabilidades inherentes á súa condición de empregador.

A sinatura do presente convenio non implicará relación laboral ou de calquera outra natureza entre as persoas que desenvolvan o programa e a Consellería de Política Social, polo que non se lle poderá esixir a esta responsabilidade ningunha por estes conceptos, nin directa nin subsidiaria.



### **SÉTIMA. Condicións económicas**

Para a realización do programa a Consellería de Política Social comprométese a achegar á Asociación ARELA a cantidade de 36.199,92€ con cargo á aplicación orzamentaria 13.02.312B.228. Este convenio será obxecto de tramitación anticipada polo que a concesión do dito importe queda condicionada á existencia de crédito axeitado e suficiente na lei de orzamentos xerais da Comunidade Autónoma para o ano 2019.

A devandita achega económica límitase á compensación de gastos e en ningún caso supón beneficio económico para a entidade conveniada.

Para o abono da compensación a entidade colaboradora presentará á Dirección Xeral de Familia, Infancia e Dinamización Demográfica , dentro dos cinco días seguintes ao mes no que se levou a cabo a actividade conveniada, os seguintes documentos:

a).-A factura correspondente, de acordo co establecido no Real Decreto 1619/2012, de 30 de novembro, polo que se aproba o Regulamento polo que se regulan as obrigas de facturación.

As facturas presentaranse a través do punto xeral de entrada do Sistema Electrónico de Facturación da Comunidade Autónoma de Galicia. O acceso ao devandito Punto Xeral de Entrada é a través da seguinte documentación :URL:<http://conselleriadefacenda.es/factura>.

b).-Informe no que se recollan as actividades realizadas durante o período.

Así mesmo, deben aportar con ocasión da primeira facturación da actividade desenvolvida certificación da entidade onde conste o persoal que leva a cabo a actividade, titulación, tipo de contrato e dedicación horaria. Unha vez aportada só é preciso remitila en caso de que sufra variación.

### **OITAVA. Protección de datos**

De conformidade co establecido na Lei orgánica 3/2018, de 5 de decembro, de protección de datos persoais e garantía dos dereitos dixitais, a entidade pública como responsable do tratamento e a asociación Arela, como encargada do tratamento, se comprometen a gardar a máis absoluta confidencialidade respecto a calquera das informacións , datos e documentación de carácter persoal a que teñan acceso en virtude do presente convenio .



Os datos persoais recadados neste procedemento serán tratados na súa condición de responsable do tratamento pola Xunta de Galicia-Consellería de Política Social, coas finalidades de levar a cabo a tramitación administrativa que se derive da xestión deste procedemento sen que poida utilizarse para usos diferentes aos previstos no mesmo.

O tratamento de datos baséase no cumprimento dunha misión de interese público, conforme á normativa recollida na ficha de procedemento incluída na Guía de Procedementos e Servizos e nas referencias recollidas en <https://www.xunta.gal/informacion-xeral-proteccion-datos>. Con todo, determinados tratamentos poderán fundarse no consentimento das persoas interesadas.

A asociación ARELA como encargada do tratamento, tratará os datos coas finalidades e os usos exclusivamente precisos para a execución deste convenio, polo que non poderán ser usados para un fin distinto.

As partes se comprometen así mesmo, a non efectuar usos nin cesións non autorizados de datos persoais recollidos en aplicación do presente convenio. A asociación ARELA se compromete a non facilitar nin divulgar datos subministrados sen o previo consentimento do/s titular/es dos datos.

Ambas partes se comprometen ao cumprimento do establecido no Regulamento (UE) 2016/679 do Parlamento Europeo e do Consello relativo á protección das persoas físicas no que respecta ao tratamento de datos persoais e a libre circulación deste datos e polo que se derroga a Directiva 95/46/CE (Regulamento xeral de protección de datos), así como na Lei orgánica 3/2018 de 5 de decembro, de protección de datos persoais e garantía dos dereitos dixitais.

As persoas interesadas poderán acceder, rectificar e suprimir os seus datos, así como exercer outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/informacion-xeral-proteccion-datos>.

### NOVENA. Seguimento

Para o seguimento deste convenio de colaboración se creará unha Comisión Mixta de Seguimento que terá como funcións velar polo



cumprimento do que nel se establece, tratar de resolver as cuestións que xurdan durante a súa execución, así como avaliar o seu funcionamento e eficacia.

Esta comisión estará integrada por:

- A directora xeral de Familia, Infancia e Dinamización Demográfica ou persoa que a supla de acordo co establecido no Decreto 176/2015, polo que se establece a estrutura orgánica da Consellería de Política Social.
- O presidente da Asociación ARELA.

Actuará como secretario, con voz pero sen voto, un funcionario/ a da Dirección Xeral de Familia, Infancia e Dinamización Demográfica.

A comisión reunirase polo menos unha vez ao ano; unha tras a sinatura deste convenio e outra tras a remisión da memoria anual. Ademais se reunirán tantas veces como sexa necesario por solicitude xustificada de calquera das partes.

A dita comisión réxese polo establecido neste convenio e polas previsións que para os órganos colexiados se conteñen na Lei 40/2015 do 1 de outubro, de réxime xurídico do sector público e na Lei 16/2010, de 17 de decembro, de organización e funcionamento da administración xeral e do sector público autonómico de Galicia

#### **DÉCIMA. Vixencia**

O presente convenio de colaboración terá unha duración dun ano, dende o 1 de xaneiro de 2019 ate o 31 de decembro de 2019.


#### **DÉCIMO PRIMEIRA. Causas de resolución e efectos**

Serán causas de resolución do presente convenio:

O incumprimento total ou parcial de calquera das cláusulas que o regulan.

- A aplicación dos fondos a fins distintos de aqueles que motivaron a concesión da subvención.
- O transcurso do tempo fixado sen que se execute a inversión obxecto da subvención.

De resolverse o convenio, a Consellería de Política Social poderá esixir o reintegro das cantidades aportadas.





En canto aos efectos estarase ao disposto no artigo 52 da citada Lei 40/2015.

### **DÉCIMO SEGUNDA. Natureza xurídica e cuestións litixiosas**

O presente convenio de colaboración terá carácter administrativo e os seus efectos se rexen polo establecido nas súas cláusulas, pola Lei 40/2015, do 1 de outubro, de réxime xurídico do sector público e a Lei 9/2017, de 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014 para resolver as lagoas e dúbidas que puideren presentarse.

As cuestións litixiosas que xurdan da súa interpretación, modificación, resolución e efectos serán resoltas pola Consellería de Política Social, poñendo os seus acordos fin á vía administrativa, e contra eles poderá interpoñerse potestativamente recurso de reposición no prazo dun mes ao abeiro dos artigos 123 e 124 da Lei 39/2015, do 1 de outubro, do procedemento administrativo común das administracións públicas ou directamente no prazo de dous meses, ante a sala do contencioso-administrativo do Tribunal Superior de Xustiza de Galicia, segundo o disposto na Lei 29/1998, de 13 de xuño, reguladora desta xurisdición.

### **DÉCIMO TERCEIRA. Publicidade**

O convenio quedará sometido en canto a súa publicidade ao establecido no artigo 15 da Lei 1/2016, do 18 de xaneiro, de transparencia e bo goberno .

A Asociación ARELA terá a obriga de subministrar á consellería toda a información necesaria para o cumprimento por aquela das obrigas previstas na Lei 1/2016, do 18 de xaneiro, de acordo co disposto no artigo 4 da dita lei.

Este convenio será obxecto de inscrición en cumprimento do establecido no Decreto 126/2006, do 20 de xullo, polo que se regula o Rexistro de Convenios da Xunta de Galicia.

As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas no mesmo, poidan ser publicados no Portal de Transparencia e Goberno Aberto.



En proba de conformidade con canto antecede, ambas partes asinan o presente convenio de colaboración, por duplicado, no lugar e data expresados.

A Conselleira de Política Social

O Presidente da Asociación Arela

Fabiola García Martínez

Santiago Fernandez Fandiño



Anexo I

| DESAGREGACIÓN DE GASTO PARA A EXECUCIÓN DO CONVENIO COA ASOCIACIÓN ARELA |                               |
|--------------------------------------------------------------------------|-------------------------------|
| Persoal (psicólogo/a e traballador/a social ou educador/a social)        | 25.814,00€                    |
| Xestión-coordinación técnica                                             | 3.185,92€                     |
| Telefonía                                                                | 700,00€                       |
| Publicidade                                                              | 600,00€                       |
| Material funxible                                                        | 600,00€                       |
| Dietas                                                                   | 4.400,00€                     |
| Aluguer salas                                                            | 900,00€                       |
| <b>TOTAL</b>                                                             | <b>36.199,92 € ( sen IVE)</b> |

